

Leipzig, 7. Mai 1561

Von Joachim Camerarius d. Ä.

Druck: Camerarius, Epistolae S. 470.

S. D. Hodie accelerans litteras valde festinanter scriptas ad te adolescens accepit petens Italiam, vt tua opera vteretur in comitibus adipiscendis. Nunc paululum otij nactus dedi has alteras alteri adolescenti et probo et erudito, cum litteris Cl[arissimi] V[irilis] Io[annis] Cratonis Medici istuc proficiscenti. De quibus tam solicite scribis, mi Hieronyme, sunt ea quidem eiusmodi, vt non possim neque debeam prorsus negligere, sed per hanc tamen curam quieto tibi esse licet. Ego postulante necessitate perfricabo os fortasse, et agam ipse caussam meam. Verùm de his fiat, quod aeterno Deo visum fuerit. Libros quos sanè diu retinueram, studui ante menses penè duos istuc remitti, et esse redditos confido. Adieceram epistolam ad D. Hencelium et te. Istum librum optarim accuratiùs esse descriptum. Sed ea sunt fata horum temporum, vt quasi in salebris aut scopolis quibusdam librorum veterum, qui mutili mendosiqüe in manibus sunt, studia nostra adhaerescere frangiqüe oporteat. Meam Chronologiam neque diligentissimam neque negligentissimam editam puto te vidisse. Fuit mihi curae, vt narrarem ea quae cognitu vtilia essent maximè. Te fortè legentem et errata corrigere et notata mihi indicare velim. Vale, et occasione oblata ad nos litteras dare ne intermittas. Si D. Cyprianus vobiscum est, fac eum meis verbis salutes. Iterum vale. Lips[iae]. Non[is] Maj. Anno 61.